

Na osnovu člana IV.4 a) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma, održanoj 2009. godine, i na sjednici Doma naroda, održanoj2009. godine, usvojila je

ZAKON O IZMJENAMA I DOPUNAMA KRIVIČNOG ZAKONA BOSNE I HERCEGOVINE

Član 1.

U Krivičnom zakonu BiH („Službeni glasnik BiH“ brojevi: 37/03,54/04,61/04,30/05),

iza člana 171. Zakona dodaje se član 171a, koji glasi:

Član 171a:

Holokaust

Holokaust predstavlja zločin genocida i zločine protiv čovječnosti počinjene od strane njemačkog nacističkog režima tokom drugog svjetskog rata koji su priznati kao takvi kroz konačne i obavezujuće odluke ili presude Međunarodnog vojnog tribunala uspostavljenog Londonskim sporazumom od 8 augusta 1945. godine.

Član 2.

Iza člana 173. Zakona dodaju se članovi 173a i 173b, koji glase:

Član 173a:

Svako onaj ko javno odobrava, poriče ili teško umanjuje zločine genocida, holokausta, zločine protiv čovječnosti, ratne zločine protiv civilnog stanovništva, utvrđenim domaćim ili međunarodnim sudom, kaznit će se kaznom zatvora u trajanju od 6 mjeseci do 3 godine.

Član 173b:

Ko distribuirao ili na drugi način učini javnosti dostupnim, kroz kompjuterske, medijske, elektronske ili druge sisteme materijal koji negira, znatno minimizira, pokušava opravdati, ili odobrava holokaust, zločin genocida ili zločine protiv čovječnosti, utvrđenim domaćim ili međunarodnim sudom, kaznit će se kaznom zatvora u trajanju od 6 mjeseci do 3 godine.

Član 3.

Ovaj Zakon stupa na snagu osmog dana od dana objavljivanja u „Službenom glasniku BiH“.

PS BiH broj: _____
_____ 2009. godine
Sarajevo

***Predsjedavajući
Predstavničkog doma
Parlamentarne skupštine BiH***

***Predsjedavajući
Doma naroda
Parlamentarne skupštine BiH***

ZAKON O IZMJENAMA I DOPUNAMA KRIVIČNOG ZAKONA BOSNE I HERCEGOVINE

OBRAZLOŽENJE:

I. USTAVNOPRAVNI OSNOV ZA DONOŠENJE ZAKONA

Ustavnopravni osnov za donošenje ovoga Zakona sadržan je u članu IV.4. a) Ustava Bosne i Hercegovine prema kojem je Parlamentarna skupština BiH nadležna za donošenje Zakona koji su potrebni za vršenje funkcija Bosne i Hercegovine po Ustavu, kao i člana III.1. g) Ustava Bosne i Hercegovine, prema kojem je u nadležnosti institucija Bosne i Hercegovine provođenje krivično-pravnih propisa.

II. RAZLOZI ZA DONOŠENJE ZAKONA

Međunarodne obaveze Bosne i Hercegovine

Generalna skupština Ujedinjenih nacija je 26. januara 2007. godine jednoglasno usvojila Rezoluciju o negiranju Holokausta (A/RES/61/255) koja „bez rezerve osuđuje bilo kakvo negiranje Holokausta“, te koja „potiče sve zemlje članice UN-a da bez rezerve odbace bilo kakvo negiranje Holokausta kao istorijskog događaja, bilo u cjelini ili djelomično, ili bilo kakve aktivnosti u tom smjeru“.

Bosna i Hercegovine je država ugovornica Dodatnog protokola na Konvenciju o kibernetičkom kriminalu o kriminalizaciji djela rasističke i ksenobone prirode počinjenih pomoću kompjuterskih sredstava iz 2003. godine. Bosna i Hercegovina je potpisala taj Protokol 9.02.2005. godine, ratificirala ga je 19.05.2006. godine, a isti je stupio na snagu u Bosni i Hercegovini 01.09.2006. godine.

Član 6. ovog Protokola nalaze svim državama ugovornicima da:

„usvoje pravne mjere neophodne da odrede iduće akte kao krivična djela po domaćem zakonu...: distribuiranje ili na drugi način činjenje javnosti dostupnim, kroz kompjuterske sisteme, materijal koji negira, znatno minimizira, odobrava ili opravdava činove genocida ili zločina protiv čovječnosti, tako definisanih međunarodnim pravom i priznatih kao takvih kroz konačne i obavezujuće odluke ili presude Međunarodnog vojnog tribunala, uspostavljenog Londonskim sporazumom od 08.08.1945. godine, ili bilo kojeg drugog međunarodnog suda uspostavljenog relevantnim međunarodnom mehanizmima i čija je nadležnost priznata od strane države članice.“

Član 6. ovog Protokola dozvoljava državama ugovornicama da pri potpisivanju Protokola izraze pričuvu od gore navedene obaveze, ali Bosna i Hercegovina nije izrazila takvu pričuvu. Stoga, usvajanje predloženog Zakona predstavlja međunarodnu obavezu Bosne i Hercegovine.

Međunarodna praksa

Trenutno čak jedanaest zemalja Evropske unije (Austrija, Belgija, Češka Republika, Francuska, Njemačka, Italija, Litvanija, Poljska, Rumunija, Slovačka), te Švicarska, propisuju negiranje Holokausta i drugih vidova genocida ili zločina protiv čovječnosti kao krivično djelo za koje je, pored novčanih kazni, propisana kazna zatvora u minimalnom trajanju između osam dana (Belgija) i dvije godine (Litvanija) i maksimalnom trajanju između dvije godine (Francuska) i dvadeset godina (Austrija), zavisno od pojedine zemlje.

S obzirom da se u svakom od ovih slučajeva, sa izuzetkom Švicarske, radi o zemljama na čijem je teritoriju, kao i u Bosni i Hercegovini, počinjen genocid, relevantna međunarodna praksa, a pogotovo praksa zemalja sa sličnom historijskom situacijom poput situacije u Bosni i Hercegovini, nalaže Bosni i Hercegovini usvajanje predloženog Zakona.

Šta više, s obzirom da je Bosna i Hercegovina jedina zemlja u svijetu za koju je Međunarodni sud pravde utvrdio da se na njenom teritoriju desio zločin genocida, te da je Bosna i Hercegovina zemlja u kojoj su, prema čitavom nizu konačnih i obavezujućih presuda Međunarodnog krivičnog suda za bivšu Jugoslaviju, počinjeni zločin genocida i brojni zločini protiv čovječnosti, neophodno je da Bosna i Hercegovina kriminalizira bilo kakvo negiranje, minimiziranje, opravdanje ili odobravanje takvih zločina.

III. PROVEDBENI MEHANIZAM

Provođenje ovog zakona osigurana je kroz postojanje državnih pravosudnih organa i to Suda Bosne i Hercegovine i Tužilaštva Bosne i Hercegovine koji su nadležni da postupaju po Krivičnom zakonu Bosne i Hercegovine.

IV. FINANSIJSKA SREDSTVA

Za provođenje ovog zakona neće biti potrebno predvidjeti dodatna sredstva u Budžetu Bosne i Hercegovine.